

四庫全書

集部

欽定四庫全書

五百家播芳大全文粹卷七十六

宋 魏齊賢

葉 棻同輯

疏

國家祈禱

南郊相國寺開啟祈恩道場疏 王岐公

諏辰長至脩報上圓因三歲以薦誠盡九州之助祭仰

企覺慈之蔭善迎陽律之生密相鉅儀來綏百順

南郊相國寺開啟祈恩道場疏

肇膺華緒薦習歲祥適用天正之辰以脩郊見之事仰
大慈之能力濟萬識于有緣協底丕成均錫羣祉

南郊開啟祈恩道場疏

蔡君謨

奠玉紫壇虔脩于大報布金紺宇特叩于能仁用集妙
因時嚴法供皇帝陛下與天均覆維日並明運神化以
無方置幅員之安處甫臨至節專講上儀就吉位以薦

誠霈渙恩而澤下有來清侶敷誦秘文式勅殊緣冥資
熙事伏願五神協序百福凝祥永隆久大之基益固延
洪之筭

南郊禮畢齋疏

宋子京

冬物告成因享親而達孝神釐來貺既均慶之以時惟
盛禮之弗違荷巨慈之旁祐即靈場而申報冀明鑒之
孔昭薦此神明祈于福應

明堂預告泗州普照明覺大師道場疏

王岐公

國家躬三歲之祠會五精之氣因嚴以教人之孝反始
以為民之祈瞻勝迹之有來濟能仁之無盡告成先事
垂保後祥

明堂禮成開啟謝在京諸廟道場疏

孫仲益

考古事帝感時念親汙于告成亶弗違禮歸大慈而締
果答幽鑒之助祥有託至忱更孚來應

太皇太后景靈宮祈福道場疏 蘇子瞻

仁心浹物自然憂樂之同孝治格天宜爾感通之速庶
殫精懇仰求上真恭惟太皇太后陛下保佑聖神勤勞
夙夜偶倦東朝之御未復太官之常爰即殊庭大陳妙
供法音上達雖假宥于雲章民志下同自不勞于秘祝
願膺勿藥之喜永保無疆之休

太后禳災疏

唐子西

比以坤慈愆于日嗇雖宮闈之茂慶神所扶持然方技

卷七十六
之未工心焉饑渴敢輸至懇仰叩能仁冀垂慧力之雄
永保徽音之固及親桑之令序膺勿藥之殊休

公主禳災疏

宋子京

竺聖流仁神華介祐顧深孺婉頗厚慈憐雖姆嫗之謹
承加椒闈之勤復屬茲歆蘊尤慎保頤已詔寶坊恭陳
法席金言徧釋花裊旅臻冀惠命之廣敷續壽祥之綿
熾仰惟靈照垂亮精衷

龍圖天章寶文閣開設年交道場疏

王岐公

寒布水行識歲功之畢就和生玉律迎天序之將新顧
承皇極之尊歸奉大慈之教肅西清之秘宇諷天竺之
靈文幾緣勝事之脩薄下時祥之應

交年祝聖道場疏

孫仲益

還相之律甫畢于歲功普覆之仁仰依于霄蔭矧嶽靈
之下底居都會之上游爰建清場聿申精意玉書金簡
交罄誦持桂旨蘭馨第勤脩薦願綏寶祚庸及生民

集賢殿正旦道場疏

孫夢得

月就初次星移故躔萬物勾萌百嘉擁集載嚴梵事爰
肅宸庭叅諷秘言仰祈真鑒被咎殃于率土蕃禧福于
生民惟法是依與時而永

慶寧宮保夏道場疏

王岐公

時迎仲夏功秩南訛太陽赫曦而流空盛氣煩鬱而被
物風啟禁盈之會歸崇佛果之脩庶格至虔以導嘉祉
集英殿保夏道場疏

炎煒御辰煩暑被物迺肅秘殿以崇梵筵披白媽之真
文禮青蓮之妙相伸憑法力丕擁善祥下逮涵生畢霑
勝果

翰林院開啟各節道場疏

歲功就緒天統復元夙嚴省戶之司具法祇園之供梵
音振席慧景延空庶仰嘉序之新常獲善因之助

內中延福宮開啟祈福道場疏

顧以眇躬嗣於丕緒念萬幾之叢脞懼五事之失中緬

企正覺之乘會歸妙智之力庶緣勝利永輔皇休

禁中祠下集福道場疏

孫夢得

至神惟默下土是依矧惟靈祠實寓禁宇當清和之標
序屬煩燠之啟期時建清場誕揚真誥伏願祓除災咎
延萃吉休普使羣生並歸密蔭

垂拱紫宸兩殿祈福道場疏

王岐公

歲律凋陰春郊叢翠念繼明于皇序思植福于含生玉
殿敷延金文諷義庶妙乘于佛果庸丕輯于邦休

寶相院為民祈福道場疏

氣肅西方畢收羣彙教流震旦有覺能仁禮妙相之垂
毫繡締文之滿義顧承休于丕緒願霑福于涵生永念
至心普依惠果

為國祈祥華嚴齋疏

邵公濟

遇災而懼法固許於祈禳求福不回禮實存於裡祀頃
以邊隅之倣擾致茲民堵之震驚冀上帝之寵于四方
俾治國之生于百藥惟有佛乘之妙力能消劫運之妖

災況十二部經莫重華嚴之大典而三千世界載於香水之淨輪按前哲之軌儀陳此時之供獻上以延洪國家之景祐下以增崇鄉黨之多祥人各保于安寧家悉臻于吉慶恭惟普賢菩薩之行願種種莊嚴毘盧如來之光明重重涉入奉少花少香者悉同九會河沙之衆預一瞻一禮者如在七寶樓閣之中願力普薰善心昭格伏願聰明元后益隆鞏固之丕圖陰隲下民各保懋遷之常產戢干戈而橐弓矢說禮樂而敦詩書蠻夷率

從中外禔福

龍圖天章閣開啟祈皇子催生道場疏

汪彥章

炎律布生靈媒占慶啟梵筵之妙供披寶藏之諦文聽
法下於諸天傳香零於四座願慈悲之慧力導因報於
真期丕序早隆至心永享

寶生院開啟祈皇子催生道場疏

孫夢得

風以瑣德獲纂厥成永惟元儲尚虛所屬維黃金之滿
界有白玉之垂毫仰締妙緣普歸法力庶承休於大統
畢濟望於羣生

福壽院塔下開啟祈皇子催生道場疏

王岐公

守邦之重久託於皇居主器之良未開于東學維華渚
之初集固羣靈之所扶肅啟淨場諦脩妙果惟願佛光
臨燭法力護持早承宗祏之基永濟生靈之望

皇子位畢開啟安慰道場疏

西慈濟世本資助善之因東學敞宮適導貽謀之慶啟
妙筵于邃宇演密藏之真文具伏法乘永綏勝福

慶土開啟安慰道場疏

蘇子瞻

揆日灼龜既鼎新于改造伐材度土遂雲集于經營丁
丁而勇於運斤橐橐而勞於縮版雖不經於衆口慮有
取於神恫幸銷履壓之虞允獲躋寧之願原其所賜敢
昧於神是用命海角之維那資大雄之妙蔭宣此五福

之教慶乎百堵之成伏願天雨千花薰蒸太和于一切
佛塵萬墨精選遐福于無邊百穀豐登羣生康泰上祝
河沙之聖壽永瞻惠日之祥光輒罄誠心庶祈靈鑒

又

百神有相致大厦之斯成一國觀新潔盛儀而圖報因
命祇園之侶廣宣貝竺之文音協海潮花紛天雨今則
誠心已格妙果斯圓祈法力之有加保皇圖於永固物
無疵癘民用平康仰惟在上之尊垂鑒由中之信

奉宸庫脩造開啟道場疏

御府所須珍奇素積禁楹之撓風雨多傷適緣役事之興特啟法乘之會庶資妙力允集多祥

越國公主宅畢工開啟安慰道場疏

唐子西

竺筵締果廣福利于法門魯館降嬪鍾愛慈于皇室涓臨嘉序就紱遂楹作清淨之道場禮光明之妙相庶憑慧力常擁休嘉

雨暘祈禱

紫宸殿開啟祈雨道場疏

淑律過中，驕陽作沴，嚮歸慈于梵席，靳濟望于農疇，而
密雲雖興，膏澤未應，念歲事之如灼，袞宸塗而載嚴，尚
冀至心之通，終垂能力之助。

紫宸殿開啟謝雨道場疏

驕陽作沴，其澤愆時，爰袞禁宸，載崇梵席，蒙應如答，降
滋及期，仰信覺慈力隨，普應。

集英殿開啟祈雨道場疏

方夏長物雨弗降滋嘉種用傷歲時安仰乃祓秘殿歸
崇妙緣庶興能仁徧澤羣土

集英殿開啟謝雨道場疏

驕陽作沴潤澤愆期爰祓禁塗夙崇梵會至誠如答不
日榮滋歸信能仁用虔美報

九龍堂開啟謝雨道場疏

興雲上漢神化莫形油然垂陰膏潤萬物潮音振坐大

卷之十一
啟法筵締果謝成並期豐稔

西京無畏三藏前開啟祈雨道場疏

唐子西

方春東作雨弗降滋歲事將虧羣心如灼大慈濟物應
現無方油然興雲以澤萬物

西京無畏三藏前開啟謝雨道場疏

李成季

春陽隔井時雨愆亢夙祈慈力善濟涵生俄天澤之應

期寔邦氓之慰望爰憑妙果庶得靈休

集英殿開啟祈雨道場疏

驕陽薄陰秋風未附密雲留雨農疇靡滋結秘法于靈
場假能仁于溥界默回嘉應大澤羣元

集英殿開啟祈晴道場疏

方秋之中淫雨暴至害于嘉穀民咨無聊顧守邦國內
懷慘結歸信覺力轉沴為祥

泗洲普照前開啟祈雨道場疏



春夏之交雨不時降宿麥將瘁民咨無聊顧守邦國永思厥咎大慈濟物通于至忱彌沴為祥期布嘉澤

相國寺開啟祈晴道場疏

夏秋之交淫雨作沴廬舍昏墊下民無聊大覺無方應現起福消伏陰晦以迓嘉祥

西京三藏前開啟祈雨道場疏

秋氣已肅亢陽薄陰槁木盈疇民望如灼大慈覺世通于至忱油然興雲徧澤嘉植

相國寺開啟祈晴道場疏

仲秋屆節暴雨為災蒙慧力之普通感沴陰之旋釋言
念有生之夥率繫能覺之仁維厲至忱用禱嘉應

集英殿開啟祈雨道場疏

秋籥適中天未降澤農疇皆稿民將遇饑敢載禱於禁
楹庸嗣膺於梵席終靳惠力普濟蒼生

集英殿開啟祈晴道場疏

秋風方中積陰肆沴天降淫雨害於棗盛民之無聊愁

困於下顧纂丕序疚心靡寧歸信覺慈幾獲善慶

左右廂為民祈晴道場疏

積陰為沴降水非常憫近甸之無年懼下民之失職仄躬省咎蠲慮致精終歸大覺之慈永保涵生之久

集英殿開啟祈雪道場疏

大冬薄歲溫氣垂陰竊循天沴之來專儆君臨之失仄躬是懼終食靡寧載祗禱于靈場庶妙施于慧力早變同雲之族終凝密霰之祥

國忌資薦

宣祖忌辰道場疏

王岐公

神功被世實開帝運之基法御賓天須仗佛因之薦宣
祖皇帝勃興景烈垂裕燕謀導積累之深仁濟艱難之
大業訓猷雖邈靈眷如存今皇帝紹宅休期遯追先憲
陳常于夏爰念思文之功荷天之休永崇長發之禋載
感諱辰之奉風嚴梵供之脩宣祖皇帝伏願受記真乘
凝神寶座灑甘露于法界燭慧燈于迷途今皇帝伏願

壽擬金輪福齊沙劫席皇圖之綿固納美俗于熙寧然
後願鼎路同寅戚藩一德上屬雲天之會下窮海寓之
幽凡暨涵生普霑勝力

順祖忌辰道場疏

楊大年

幽風流頌陳王業之艱難梵澤垂文降福祥之孚佑諱
辰甫及妙果宜憑伏惟順祖惠元皇帝蘊上聖之資累
元功之茂詒孫謀而及遠啟天命之來符今皇帝奉清
明之宮存馨香之德敬仁祠之淨土繙文佛之秘詮順

祖惠元皇帝伏願寂並真游高臨覺地集祥綿緒敷嚮
羣倫今皇帝伏願鴻筭後天至慈冒世萬寓臻於朴厚
四極格于混同然後願台輔協恭宗圖繁衍日星順夫
軌道黍稷滋于有年舉是含生悉登壽域

僖祖忌辰道場疏

李成季

積行累功肇啟千齡之運報本反始莫窮萬世之思方
諱日之俯臨憑妙緣之上薦惟願證一乘法離六欲天
挹仙聖於九清御神靈於四海本支相續與蒼筤以長

榮社稷愈安如須彌而不動

太祖忌辰道場疏

漢業開基夙契當天之運軒遊乘景載臨厭代之辰預
即仁祠大脩法供起神寶界自離五翳之根垂裕皇圖
更衍千齡之慶

太祖忌辰道場疏

受命開基肇應列精之運奉先追孝聿崇覺力之因爰
屬諱辰大脩法會具嚴蒲塞之供徧釋貝多之文庶集

勝緣仰資升濟

太祖忌辰道場疏

歐陽永叔

受命開先肇基興運昭祖功而不顯綿寶祚于無疆用
深追遠之誠式奉明齋之薦載嚴淨刹以集善因伏願
覺力常資威靈如在延洪宗祏集慶妙冲庶邦咸被于
餘休品物共均于博愛

太祖忌辰道場疏

盛烈當天基皇圖于億載大雄濟世殖善利于羣生屬

載闕乎諱辰用大脩于法供庶嚴勝果益迓厚祥

太祖忌辰道場疏

紹百王而開統昭繼述于祖功植衆善之妙因爰憑依
于覺力循有邦之舊典稽諱日以先期載肅齋場並延
淨侶瞻玉毫之具相誦貝牒之靈文仰依慈惠之仁遐
薦清真之馭庶資冥福式廣孝思

太宗忌辰道場疏

李成季

繼志圖功廣規模於萬世興文偃武混夷夏於一區流

澤被乎子孫餘烈昭于天地百神幽贊四海永懷載更
厭御之辰肅展事存之禮敢憑妙果仰薦真游伏願超
最上乘作無量福皇家繼緒如止于千花法界含生長
霑于一雨

太宗忌辰道場疏

楊大年

至大之德列原廟以推尊無量之仁依覺王而薦祐太
宗皇帝恩淪四外運紹再傳化治之光在人昌明之慶
垂後今皇帝永思先烈濬發精誠有來淨行之流聿脩

秘藏之妙太宗皇帝超遊真界廣覆羣靈慧如日之圓
明化等空而常寂今皇帝伏願壽年山固聲教天臨儲
嗣寢蕃宗枝彌盛宰路協恭而贊輔霄躔應候而泰和
庶績順時百嘉遂性

太宗忌辰道場疏

軒遊已遠百年方仰于威神堯歷維新萬乘彌深于孺
慕每屬上仙之日益深罔極之悲是崇衆善之緣式廣
因心之孝伏惟太宗皇帝握樞御極恭已臨民耀神武

以混車書體至仁而懷動植焦勞致治早鍾厭代之期
錫羨詒謀光啟卜年之祚今皇帝允膺帝錄悉擁天休
紫壇隆升配之儀清廟著不祧之典晬容載穆聿嚴如
在之靈諱日俯臨更極以時之感爰就布金之地仰瞻
被袞之儀四象翹誠千官就列遵三乾之教脩香積之
齋用憑供佛之良因以奉在天之神駕太宗皇帝伏願
高居智地常御寶乘證大梵之尊嚴俯祐三千之界福
丕圖於悠久彌昌億萬之年今皇帝伏願八表歸依百

靈薦祉西清聽斷垂裳臻大定之期東岱告成探策表
無疆之筭然後願黃扉良弼益光咨嶽之謀朱邱茂親
克保維城之訓四氣咸均于嶰谷五兵永戢于靈臺凡
居普率之間共樂淳熙之化

真宗忌辰道場疏

歐陽永叔

仙馭乘雲式臨於遠日春陽濡露載感於孝思爰即梵
居俾延淨侶瞻玉毫之妙相啟具牒之真文集此勝因
仰資冥祐

真宗忌辰道場疏

神遊斯遠方仰于軒威諱日茲臨載深于追慕虔依正
覺俾集善因肅禁殿以有嚴啟法筵而風設仰祈冥助
用慰孝思

真宗忌辰道場疏

紫極收神永悼六飛之駕靈宮追福式研衆妙之門恭
惟真宗皇帝仁洽九圍道超千古奉綠圖於翠水封玉
檢于石閭脫屣之期遽游于仙嶽遺弓之感空慕于塵寰

今皇帝明篤孝誠通祇典則載履徹音之旦重深濡露之思是用宣九清之秘文資三洞之真果真宗皇帝伏願儲精玉鏡度品珠臺永保在天之靈下綏卜世之福今皇帝伏願撫國長懋納民太和躋聖德于日升等帝齡於天覆然後願蔭周羣辟長扶輦固之基樂及含生盡沐希夷之化

仁宗忌辰道場疏

李成季

大德宜民共席天雲之覆庶邦懷惠更深河洛之思垂

衣拱手閒燕於四十年示烈遺風扶持於億萬世顧真
遊之雖遠宜昭報之不忘恭啟法筵上資福地惟願六
通自在萬行圓成入非想天放光明于寶座以本願力
徧功德于河沙子孫承不拔之基廟社庇無疆之福

仁宗忌辰道場疏

聖業垂鴻覆及眇躬之御仙遊趣駕迅驚流景之遷撫
過樂之初辰却棲真之列宇茂敷冲式欽繹靈文庶薦
妙於層虛益侈祥於多祚

仁宗忌辰道場疏

妙道難名至神獨粹宅靈觀而在上垂博濟于無私當
淑春之杪辰紀文考之諱旦虔依靖宇申繹冲文異收
金籙之緣助介玉虛之祐

仁宗忌辰道場疏

仙輿上漢莫追靈駟之遊寶藏緒文鳳下神龍之聽感
露濡于杪辰紀音遏于海隅庶證果于上乘益超神于
真際仰申遐慕陰佑熙圖

英宗忌辰道場疏

駟隙馳光忽履撤音之旦龍華薦會廣資締佛之緣庶
乘大覺之方自悟至真之趣超神絕境垂裕昌圖

英宗忌辰道場疏

仙輿棄代氣序如流梵席薦因津梁彼岸斷羣迷于非
見應諸福于有緣大廣法乘往資超識

英宗忌辰道場疏

賓天不復莫窮仙馭之遊應物有緣須仗佛家之果屬

撒音之初旦結衆善之法筵庶證念于真空益助嚴于
超識

英宗忌辰道場疏

仙雲忽駕莫窮絕景之遊春露向濡載厯撒音之旦即
棲神之秘宇繹象帝之真筌庶嚴徑升彌裕後祉

英宗忌辰道場疏

王岐公

春露載零悵流陰之倏改宮輿晚駕追軼景以何從望
仙寢之遺儀倣祗園之法會庶資升趣益侈後祥

神宗忌辰道場疏

痛龍髯之中斷未盡哀號感春露之已濡已臨諱日神
遊浸遠塵世何知顧白晝之不留即金仙之往扣伏願
聞一音之真妙滅諸念于往來超最上乘得無漏果寶
幢香篆長為天上之遊法雨慈雲更作人間之福

神宗忌辰道場疏

至德難名已立配天之極孝思永慕蓋有終身之憂惟
是佛乘庶資冥福屬弓劒上賓之日就衣冠出游之庭

虔設淨筵俾嚴勝果庶超真覺永庇含生



五百家播芳大全文粹卷七十六

欽定四庫全書

集部

五百家播芳大全文粹卷七十八

詳校官侍郎

臣劉躍雲

助教

臣常循覆勘

總校官編修

臣王燕緒

校對官中書

臣范鏊

謄錄監生

臣戴祖臯

欽定四庫全書

五百家播芳大全文粹卷七十七

宋 魏齊賢

葉 蔡同輯

疏

國忌資薦

禁中安奉祖宗御容道場疏 王岐公

顧以瑣涼承於基序敞西清之秘宇奉列聖之容衣載

嚴佛果之脩以助仙遊之樂仰懷丕烈彌惕孝思

禁中安奉仁宗御容道場疏

神遊日遠睟象天臨將陳法衛之儀往宅虛宮之秘會
緣四衆證法三乘庶憑真諦之文仰助遐登之果

仁宗開啟百日道場疏

雲輿厭代歟驚御氣之遊蓮宇繙經具薦離塵之果先
皇帝伏願超神十地燕景三清證圓滿之化身達慈悲
之妙觀永依佛趣長祐邦圖

仁宗百日開啟道場疏

仙輿厭代晦朔如流梵席荐因津梁彼岸即大昕之正
宇陳法供于諸天庶輯妙緣以嚴去識

仁宗小祥開啟道場疏

神機厭代仙御賓空忽驚歲籥之周空結宸衷之慕夙
嚴秘宇崇建梵筵仰資慧境之遊垂錫皇圖之羨

仁宗大祥開啟道場疏

仙位登真莫返乘雲之馭喪廬終制載驚濡露之辰啟

清會于仁祠薦妙因于慧境仰助在天之德益垂有國之休

仁宗大祥開啟道場疏

湖龍促駕莫追層漢之遊隙駟流陰歟及再期之慕爰
即寶坊之所載宣密藏之文具薦精因仰資去識

英宗二七水陸道場疏

契德在天空結遺氓之慕大雄出世普隨涵識之緣瞻
金色之妙儀倣龍華之法會庶資覺力仰助遐升

英宗百日道場啟

仙輿趣駕莫攀上漢之遊宮隙流陰遽及踰時之慕建
妙儀于別境摹法會于諸天庶格精因更資遐陟

神宗小祥道場啟

帝鄉孰在莫返神遊日軌不留已成周歲恩涵萬類哀
動庶心恭惟神宗皇帝聰明睿知之有臨禮樂政刑而
不悖天人和協宗廟安安雖堯帝之功獨資于神聖而
文王之壽終損于憂勤永辭萬國之依遽厯四時之變

玉音未遠龍馭何追抱鼎湖之弓潛焉流涕望裕林之
栢森以成行敢薦妙因少伸哀祝伏願證一乘法離六
欲天挹仙聖于九清御神靈于四海乾坤日月共扶不
拔之基社稷子孫永庇無疆之福

神宗小祥道場疏

龍去鼎湖莫返登遐之馭律回姑洗奄當厭御之辰躬
啟梵筵仰伸孺慕惟願六通自在十地圖成離有想天下
不墮金輪之果超極樂世界長瞻月相之尊本支永庇

於慈雲廟社共依于法力

神宗大祥道場啟

密旨如昨新穀再升望仙馭于帝鄉陳法筵于淨宇人
天來會共脩最勝之緣梵釋同遊永錫無疆之慶

神宗齋疏

李成季

龍去橋山悵乘雲之已遠天崩杞國縱殞骨以何支悲
動百神哀纏萬國恭惟大行皇帝道躋曠古澤被生民
焦心勞思幾至于二十年崇德廣業將垂於億萬世四

方底定百度緝熙未能燕息以葆和終以憂勤而損壽
遽辭宸極長往帝鄉顧丹鼎之悲涼空餘塵跡望鈞天
于恍惚宛隔神丘爰集勝因少伸孺慕惟願證一乘法
離六欲天挹仙聖于九清御神靈于四海乾坤日月共
扶不拔之基社稷子孫永庇無疆之福

年節資薦仁宗道場疏

王岐公

上賓之馭容衛莫瞻西洛之丘威神空在顧昊天之曷
報感春露之載零爰集梵因更資超識

冬節資薦仁宗道場疏

寶燭導和載感踐長之節仙峰駐景莫追御歛之游即
西洛之神宮建五天之法席庶憑妙果益助遐登

十月旦太后資薦英宗道場疏

仙馭不復歲籥存移瞻神寢以非遙感寒風之又至庶
憑妙果永助遐升

十月旦資薦神宗道場疏

蘇子瞻

橋山永望莫瞻弓劍之餘陽月載臨徒增霜露之感昭

延淨衆崇建梵筵庶集勝因仰資真馭

冬至資薦神宗道場疏

聖神陟降釋梵後先適更來復之良茂薦往生之福虔脩淨供仰道真遊

十月旦資薦仁宗道場疏

王岐公

冬月之初寒氣忽至橋山之下仙馭難留陳法供于梵筵奉遺儀于神寢無憑大覺之果或助上賓之遊

正月旦資薦神宗道場疏

蘇子瞻

乘黃屋以上賓莫追風馭抱烏號而永慕再厯春朝敢
仗勝緣式開淨供仰頌羲堯之德永追梵釋之遊

十月旦資薦英宗道場疏

王岐公

鼎湖仙去愴遺景之莫留柏寢寒生感沍陰之忽暮倣
三天之法供導諸佛之真詮冀廣妙因用嚴對越

下寒節資薦神宗道場疏

蘇子瞻

甚雨疾風感春律之將變鑽燧改火悼喪期之不留爰
啟淨筵以資冥福願登大覺永濟蒼生

乾元節資薦仁宗道場疏

王岐公

仙輿促駕莫追御歟之遊歲籥移陰載感流虹之節即
神丘之下館做法會于諸天庶集妙緣用資超識

太上皇小祥功德疏

瑤池宴罷翠華方返于西崑荆鼎丹成列辟遽悲于遺
劍適屆小祥之節彌深綿宇之思恭就祗園大誦秘典
伏惟尊號皇帝睟容如在仙仗匪遙乘般若之殊因同
逍遙于淨界神歸兜率永叅釋梵之遊心繫娑婆更錫

臣民之社聊効涓埃之微悃庸伸葵藿之卑誠

章獻明肅皇后忌辰道場疏
李成季

北郊薦服已推配日之賢南面抱孤更極輔天之力憂
勤致理慈愛及民屬諱日之再更仰徽音之如在敢憑
薰唄上祝莊嚴伏願入觀上門超真乘于十地以威神
力扶洪業于萬年

孝明皇后忌辰道場疏

雲衣縹緲顧羽駕之何追寶宇深嚴想徽音之如在俯

臨諱日恭啟法筵伏願三十六天真超無上千萬億劫
不墮有情生靈共濟于慈梁社稷長依于福海

文懿皇后忌辰道場疏

王岐公

旋九天之馭已邈于徽音倡諸佛之詮是憑于勝福文
懿皇后躬肅雍之德稟榮順之儀助正道于先朝留深
慈于復廟今皇帝緬追遺懿明發孝思載蠲長樂之辰
式仗度門之慶文懿皇后伏願乘二梵之果超羣生之
迷灑甘露於神天妙大雲於法界今皇帝伏願皇圖日

懋聖業天隆鼓中和於萬靈一聲教於殊俗然後願台
躔永耀宗葉長榮盡有相於幽明享無邊之威力

元德皇太后忌辰道場疏

楊大年

伏以堯門積慶適鍾聖母之祥佛國往生更賴法王之
力屬忌辰之斯屆痛仙馭以難追伏惟元德皇太后沙
麓炳靈塗山毓德紀徽音於彤管美播聲詩仰嚴紀於
闕宮禮崇孝享今皇帝表懷顧復深念劬勞感昊天罔
極之恩崇淨土有為之果每值上仙之日克脩衆善之

因瞻十力之慈尊會五天之梵衆載嚴佛事式奉神遊
元德皇太后伏願聞法靈山棲真內院念超三界高臨
解脫之方智入一乘早證摩耶之果今皇帝伏願金輪
永固寶厯彌昌武庫橐弓見遠夷之率服仙衣拂石同
聖壽之延洪然後願藩屏宗翰固本支於百世樞衡鼎
鼐平懸象於三階羣官盡効於忠貞萬姓咸躋於仁壽
明肅皇后忌辰道場疏

仙遊不復載臨奉諱之辰慧果無邊益助超生之識願

慈儀之終閔悼宸慮之永思仰乘諸佛之筌陰祚有邦之慶

惠明皇后忌辰道場疏

神遊已遠方尊如在之靈佛事載嚴用植無邊之福爰及上仙之日聿從衆善之因伏惟惠明皇后積德貽謀流光錫羨長秋追號允鍾似續之祥清廟薦誠克茂吉蠲之禮今皇帝運鍾下武義篤奉先祇荷宗祧永懷祖妣俯臨諱日誕舉國章特就精藍聿陳淨供會威德六

和之衆瞻慈悲三界之尊庶憑金地之良緣克奉玉
清之仙駕惠明皇后伏願早蒙佛記常住天宮受百福
之莊嚴證一乘之解脫配食永隆於廟貌卜年更祐於
邦家今皇帝伏願位固金輪功周沙界五兵不試盡銷
楚鐵之英萬壽無疆益茂莊椿之筭然後願列藩荷寵
更隆磐石之基當國輸忠永著和羹之效百辟咸傾於
誠節萬民共樂於昇平凡居覆幬之間同被文明之化

章獻明肅皇后忌辰道場疏

王岐公

軒宮輪耀再丁遏密之期彤管流音空詠思齊之美啟
丹臺之法會繡藥笈之靈文庶憑妙宗益資遐舉

簡穆皇后忌辰道場疏

聖心追遠仰瞻如在之靈佛事崇因式薦無邊之祉屬
臨諱日舉集勝緣伏惟簡穆皇后道茂坤儀德昌王業
克協曾沙之慶誕昭彤管之華懿矩彌芳徽音載邈今
皇帝紹隆景祚奉若仙猷仰真馭之彌虔罄孝思之無
斁聿遵象教虔奉齋脩簡穆皇后伏願悟證上乘超登

無垢具慈因于十號佑華旦于三天今皇帝伏願聖德
誕敷仁風丕冒七政齊而協厯九功敘以咸歌永保無
疆之休茂洽重熙之化然後願宗英輯睦道固維城良
輔弼諧功宣作礪燭聲教于率土書瑞應于豐年

昭憲皇后忌辰道場疏

仙馭上賓邈靈遊而遂遠星龍綿合儼遺範以如存式
臨奉諱之辰欽薦無疆之祉伏惟昭憲皇后歆祥聖武
宅順坤儀首基椒極之華參翊蘿圖之永懿猷茂建柔

化丕昭悟真諦以馭神衍慶謀而垂後今皇帝永懷徽
則介助真詮悵先忌之環經凝孝思而叢感祓祥金地
披繹寶文旅華祴以巡香儼珍羞而侑供冀憑慧果上
續勝緣昭憲皇后伏願法露普流慈雲周蔭宴居淨界
常為十號之證因顧在朝家彌極九皇之高治今皇帝
伏願奉承鴻緒增鞏丕基絕瑞高符交天人而相荅尊
名盛德煥日月以常新四序順成八風和布臺師偃戢
原種豐甘然後願磐石英藩永茂維城之業乾台哲輔

益隆駿假之勲官師胥協於忠良黎獻並躋於仁壽

元德皇后忌辰道場疏

葛謙白

貝葉旁行存誠西竺琅函隱韻歸命叢霄輒憑二教之
真筌仰助一靈之飄馭元德皇后伏願力持法印永庇
道林悟驚嶺之上乘作龜臺之仙伴佛土三千界親覲
世尊玉京十二樓遍遊仙境垂衣裳宇錫羨皇圖

章懷皇后忌辰道場疏

覩天作合配媯汭以流芳濡露感時供緇黃而追福章

懷皇后伏願圓融根境領悟希夷聞佛音于玉毫之前
受法錄于瓊章之上法航大濟見慈氏于龍華羽駕超
升交神人于姑射

隆祐皇后首七水陸道場疏

汪彥章

慈壺興災仙遊厭代既徽音之永隔非真實以疇依大
行隆祐皇后伏願頓悟三乘坐超十地如明燈焰千薪
傳而千處不窮若大海流一滴入而一切無異證成佛
果敷祐邦圖

隆祐皇后二七道場疏

慈闈棄養永纏隙駟之哀仙馭升遐俄閱親蠶之候爰
即椒塗之地恭繙貝葉之文憑仗勝因增崇冥福用東
朝之積慶契西竺之真筌

隆祐皇后六七道場疏

厚德遺基永恃山河之載仙遊歛駕徒驚日月之流爰
陳蒲塞之羞并集比尼之衆闡揚海藏湔祓世氛庶啟
在天之靈即登成佛之果

昭慈獻烈皇后卒哭道場疏

徽音寢遠晨昏復見以無期喪紀敢逾哭踊自茲而有
節即長樂嚴凝之地闡祇園秘密之文仰祈如在之靈
即證無邊之果

昭慈獻烈皇后几筵道場疏

迅景莫留隆冬俄及瞻玉衣之在御驚總帳之生寒爰
即禁楹普作天人之供庶扶慈極永從帝釋之游稽首
覺雄垂心冥祐

昭慈獻烈皇后啟攢水陸道場疏

汪彥章

駟駕登遐莫盡飾終之報龍輜在御將臨先遠之期爰
稽梵釋之文溥作人天之供徼福萬緣之會歸誠兩足
之尊仰冀慈雲俛垂法蔭悟總持于妙湛用升濟以神
明

隆祐皇后水陸道場疏

天禍禁園世亡慈極徒哀迷而失次念追報以無前惟

仗真乘庶增冥福悟無明之種子乘大覺之津梁願力
所覃神基斯固

昭慈獻烈皇后水陸道場疏

羨道既封雖山川之在望虞牲屢薦悵日月之如流恭
命苾芻之徒普羞蒲塞之供仰祈法力陰導神遊同知
見于覺皇錫休祥于丕祚

昭慈獻烈皇后中元水陸道場疏

汪彥章

塵擯宮衣理莫回于長夜涼生陵柏時奄及于新秋當
必芻是薦之辰陳蒲塞無遮之供仰祈法力永導仙游
集諸福于人天降餘祥于宗社

文懿皇后追薦道場疏

楊大年

閼宮嚴奉尊藏主之遺靈香刈追嚴悼捫天之遠駕伏
惟文懿皇后德侔厚地慶協曾沙早正號於中闈尚留
勞於彤管今皇帝感慈訓族昭孝厚民屬諱日之聿臨
企真遊而永慕大營蒲塞之饌遐薦飛飈之輪文懿皇

后伏願足履紺蓮神棲寶網面禮薄迦之相坐證三乘
劫拂淨居之衣用綿百世今皇帝伏願福量如海壽厯
等山廣錫羨于本支彌昌異業遵龐鴻之祺祉大庇生
民然後願宗邸茂親巖廊雋輔交著弼諧之績同均凱
樂之宜官師咸竭于忠圖夷夏率柔于睿化

明德皇后中祥道場疏

丙殿上仙四氣俄周于歲律祇園薦福一人方極于孝
思是崇出世之良因以奉在天之神馭伏惟明德皇后

高丘襲慶沙麓儲祥作合神宗二紀式隆于陰教居尊
長樂萬方同仰于母儀俄運逼於真遊因哀深於宸極
今皇帝至仁守位盡禮事親慶方洽于承顏悲忽驟于
曷恃家邦異制勉遵易月之規霜露永懷彌切因心之
感玄寢已終于遠日忌辰爰及于中祥特就精藍虔脩
淨供會南洲之開士崇西竺之妙緣庶憑大覺之深慈
克證上生之聖果明德皇后伏願寶乘悟法仙果棲神
受佛記於雙林福皇圖于百世今皇帝伏願萬靈薦祉

千聖垂休壽考無疆克協山呼之數干戈載戢永符海宴之祥然後願親賢毓德于懿藩輔弼宣猷于宰府羣后竭輸忠之効庶邦堅共治之誠凡居普率之間共治昇平之化

請疏

住持

請珏老住龍興疏

邵公濟

釋迦過去彌勒未來當寥絕之兩間孰收召于四衆珏

公躬履具戒廣翻秘言初說臨江之禪若契臨濟之事
眷茲故壘舊數精廬久羣笑于狐狸輒擯斥于龍象埽
除去霹靂手興起發勇猛心削牘以聞奉制曰可天堂
再啟重現光明之拳丈室既成褊容高廣之座屬茲開
士越彼稠人果誦義之有歸自當仁而不避出贊歎之
妙語用光華于淨坊

請湛老住崇寧疏

晁无咎

大圓頓教不以世求妙淨明心不緣他悟既衆生本來

成佛則祖師何以為人皆由流轉塵勞多生認賊所以顛倒迷悶終日怖頭有大智人緣在震旦面壁無語不妨滿國清風隻履西歸依舊一天明月雖他方之已熟眷此土之未敷今皇帝陛下紹述聖猷嗣隆法寶合百工歸美之意建萬壽崇寧之名妙喜擎來化人幻出是用騰封章而有請屈道德之肯臨恭惟和尚受祖祖心提方方印等慈不擇貧富任運無有東西視不見聽不聞在三藏鼻孔上立遇者死當者壞從德嶠棒頭出來

願垂悲憐副此翹竚不用變生作熟自然識路知家以
不盡燈度無量衆葛藤具斷阿誰曾縛汝來皮髓兼忘
那箇不是精底上資睿筭永洽純熙旁沐民生普離留
答

請圓老住教院疏

孫仲益

如來起最上乘初無言說佛子墮無始劫久住輪回閔
諸一切有情當為衆生說法某人讀書悟斷輪之妙談
空契投芥之機面壁九年已忘言語道彈指千偈猶現

句文身指彼岸之津梁示羣迷之領袖牆壁瓦礫皆具
法音龍天鬼神遍作花雨

請密老住玉屏疏

虞推甫

何佛無因且說法身報化是山有寺不論見在去來況
開山建無礙道場傳佛正法眼心藏不逢妙覺孰慰羣
心恭惟某禪師開自在門行真實諦身如青蓮出水有
塵莫汙心同白月行空無跡可踐興精藍于蠹敝荒頽
之後成大藏于笑談指顧之間文驪者千萬人害成者

二三子載清風而歸去為勝地而鼎來山間草木欣欣
不知春力菴裏雲雷濶濶溥接初機增光玉屏山願升
寶蓋座

請妙印大師住龜潭疏

孫仲益

一世解鑣尚存馬鬣三歸集福今在龜泉伏惟某人舍
衛國之比丘祇陀林之上首安心得法隨處現身九節
烏藤去作閒雲之伴一丘黃壤佇霑法雨之滋

請印老住中巖疏

邵公濟

貝闕珠宮自菩薩龍所避瑤堦金地為阿羅漢所居必
極西方之流故堪東道之選伏惟印老和尚舌根如蜜
有花木香襟懷挾水無塵土氣操節凜金石之異言語
如雲霞之姿已堂堂而經奇但寂寂而埋照苦同淨業
數眷老夫勅書閣下接太乙真人吏隱山間近第五尊
者睇林泉之勝踐適巡管之上遊閱平生之故交在舉
世之開士亮出處之母必異然諾之未忘訶佛選佛場
中想四衆之避席將母慈母巖下尚千載之卜鄰

請悟禪師住興化疏

陳無已

南北不異禪律相資曲士拘文起差別于耳目至人達
觀示平等于冤親不有別傳孰開異見某公尊者承佛
受記為世導師紹雲門之正宗分慧林之半座望破額
之氣知正法之傍行觀優曇之華信異人之間出知時
莫逆觀化方隆毋辭千里之行以慰一方之望

請普老住太平疏

李元應

久嚮太平老子向無孔笛中吹箇曲解嘹唳太清惟三

世諸佛拍得是六代祖師和得徹山鼓應得就道吾舞
得成若向宮商角徵中求今已槎過去也行遍大唐國
知音能有幾人況武信未為陋而廣利久虛法席開市
子裏三家村中恐有半箇人聽不以耳幸師命駕

請正老住廣孝疏

寒山無心自是豐干饒舌馬祖多事堅要黃梅出山這
山箭子昔曾透過九重城汝鈍根師何嘗夢見六代祖
况趙州老大漢住處未知那臨濟小厮兒具眼有數試

看朝生鳳子解接老去驢年惟正禪師具潮外音同水
中月當時行脚懸知我子天然今者還家正謂老婆心
切接得青原斧子踢倒百丈淨瓶雖短小而舌至梵天
能圓融而量廓沙界豎起拂子這妙月西天亦無吹動
布毛箇佛法此間也有真菩薩子現宰官身知廣利之
叢林非野狐之窟宅善濟塔下觸目菩提蘭陔菴中通
身般若本自頭頭具足鷓鴣啼處野花香不妨處處圓
通燕子歸來深院靜牧笛嘔啞非是曲聽取一曲太平

歌

請嘉州密老住宜梅山疏

翁起予

嘉州石像擎天作麼蓋藏陝府鐵牛下口不勞吞吐既
有隨身之法力可施鍛佛之鉗鎚振曹洞已墜宗風判
祖禰未了公案會有達識成此妙緣密公長老宿植道
根深得法髓乃枯木之的子正芙蓉之長孫敲唱俱行
體周全露斷三種之滲漏辨五位之正偏迹隱叢林名
高海嶠適有宜川之上刹實為臨汝之勝遊輒往巾瓶

來臨巖壑桃花見後不須過眼疑生梅子熟時切忌當頭問著勉從衆請幸勿固辭

請恩老住蔣山疏

張安國

陝府鐵牛脚力負萬鈞之重石霜角虎眼光搖百步之威欲轉無上法輪須還本分尊宿恩公長老禪師一生打硬四海知名毘那不二門當仁不讓國師無縫塔此義卻諳截斷衆流壁立千仞仍眷鍾山之勝地實繫圓悟之昔遊俗駕初回潮音未振考之公論僉欲師來拘

折竹單且與逢場作戲橫擔拄杖直須覲面相呈稽首
妙華王請祝聖人壽

請趙居士住觀音院疏

陳無已

觀音古刹地聖人凡穎上名都信深緣熟是興無盡之
供用開大施之心趙君居士見遠察微有家無累悟解
不立已契祖師之禪悲顧未終更廣衆生之福憑茲一
舉以効初心

請凝藏住天宮院疏

鄭伯敦

牢落數椽在梅江之闌市端居一席須茶苑之名流凝
公長老純白天資孤高道妙毘盧寶藏曾是護持兜率
天宮何方坐斷看曇花之初出祝蘿祚之無疆

聖旨請聞老住徑山疏

黃花翠竹是山皆有道場拍板門槌到處堪呈戲具眷
徑山之勝槩實實剎之善因法席偶虛當仁誰屬恭惟
聞公長老丹霞敵手枯木親孫一口吸盡西江四蹄踏
殺天下得正眼法為勝沙門酌不竭而注不盈窮益深

而測益遠空心及第豈偶然哉垂手於人無不可者共
慶人天之會遽邀龍象之來

請珪老住黃山疏

翁起予

輓球指拍當面熱瞞擊竹捲簾遭人冷笑現成公案不
勞忉怛商量本分作家別請斬新拈出珪公長老早携
龍門之法印出總虎溪之道場意氣高壓諸方見解平
欺十聖拈槌豎拂不惟截斷衆流鏤月雕風更能遊戲
三昧矧黃山之勝境實緇侶之上遊猊座久虛雷音未

振顧徇人天之請覬同龍象之來敲開祖佛頂門拽轉
衲僧鼻孔上資睿筭俯慰凡情

五百家播芳大全文粹卷七十七

欽定四庫全書

五百家播芳大全文粹卷七十八

宋 魏齊賢

葉 棻同輯

請疏

住持

請駢老住惠安疏

翁起予

臨濟一喝響似雷奔黃龍三闕峻如壁立雲居祐老僅

會放簾捲簾兜率悅公頗知我手佛手張無盡未免攬
行奪市真如大似借永獻花雖云自有家風不出這般
窠臼公案見在宗派分明須求未後老成埽蕩從前陳
迹駢公長老以無礙辯得最上乘蚤傳疏山之衣人云
跨竈須坐衡嶽之頂誰敢當鋒四馳踏殺天下人一口
吸盡西江水真箇光照先覺可謂不忝後昆念憑川之
要津有惠安之古剎鐘魚不振猊象久虛敢屈高蹤來
臨法座別傳新法要教祖佛點頭一洗前塵便使雲山

改色勉從敬請幸勿固辭

請六祖禪師住中和疏

黃魯直

鐘魚鼓板癡禪盡飽而六祖饑卧具牀敷濁禪盡溫而
六祖冷使道人如此失所檀越何處用心敢為諸仁畧
開少分相逢展手不妨貧女一錢隨喜轉頭報在龍華
三會

請觀音禪師疏

陳無已

出處有緣相時而動去來無意以衆為心某公禪師行

歷諸方歸安一榻浩如止水衆至則形殷若震雷物待而發惟此東刹今號左禪乃古宿之道場而昔賢之施會異人間出衆志大同續圓通之法燈成先佛之遠記法施務廣當衆建而共持祖道大行復一枝之旁出

請觀音禪師疏

知者不說言語所以為人德必有能住持乃其餘事某公禪師言未發口而達者知其有道功未見事而談者知其有才信淵默而雷聲由孝友而成政顧茲勝地宜

得異人祖令當行正須無說羣能効力不假有為願效
至情同伸勸請

請觀音禪師疏

陳無已

世當末法方葱嶺之西歸地則左禪乃福城之東際人
天合力緣法同時某公禪師徧歷五宗頓開千眼著衣
喫飯肯學瀉山之禪得髓與皮不落少林之肉十年面
壁未遇知音千里同風是歸作者無緣處說法有佛處
稱尊勉狗衆心以成本願

請悟師住文頂疏

楊祐甫

諸行無常惟禪為第一義精義無二故佛說無上乘是
法無等級之差吾儕有根性之別其解脫者頓悟刹那
之頃彼沉迷者輪迴意劫之多式賴正知為了大事茲
佛所囑非師而誰伏惟長老和尚摠持多心游戲衆妙
大珠瑩於濁惡慧劍倚於虛空諸聖經行無空過者大
衆瞻仰決非偶然然而時有適來緣不接合浮盃湘水
起無住心還錫蜀門現大悲性過故山而著舊膜拜入

吾室而龍象歡顏諱佛衣之有歸捨王城而焉往廼率
四輩同啟一心敬奉懇誠諦聽開諾伏望闢正覺路闡
方便門濟渡斯人俱到彼岸

請解空長老住江心疏

第一義諦本來元自分明不二法門了然也無多子故
曹溪分派於滴水而少林續燄于枝燈見性求心大好
作佛作祖傳衣付鉢要須及子及孫能益振于宗風庶
有光于道價眷此中門之勝鬱為東制之雄兩峯屹烟

霧之中萬瓦出雲濤之上見成底好箇公案近新來刼
立話頭地勝人凡唱高和寡朝音獲振豈惟竦聽于魚
龍佛事增脩要使斬新于鐘鼓欲舉斯事原屬當人恭
惟某人天下大禪衆中尊宿脚跟步步點地鼻孔處處
遼天喝下承當妙得雲蓋之骨髓棒頭荐取別開臨濟
之眉毛真叢林一角之麟寶法窟九苞之鳳願還錫杖
來坐道場禪門何憚于去來道眼寧分於彼此三十年
後信天竺此話盛行八千歲中祝南山之壽難老

請圓照禪師疏

蘇子瞻

竊以大道無為入之必假聞見一毫頓悟得之乃離聰
明為自在門真無礙法天降一雨徧浹羣生佛無二門
併歸真諦恭惟本師長老脫離常見洒落孤風其為已
也如月行空無迹可踐其為人也如金入範隨注皆圓
既不滯于一方豈有違于衆欲而況淨慈古剎錢氏
福田代不乏傳人所信嚮閔矜善俗久靳真馭以來臨
惻隱慈心願順羣誠之再請

再請震老疏

劉仲遠

橫海鱣鯨寧容蟻制摩霄鴻鵠非復燕知在靈府以長
閑於贅疣而奚問白水長老一提佛印九坐道場雲渺
渺以無心水洄洄而不競澄之不清而撓之不濁飄然
而去則翻然而來復歸我眉洞天為說普賢樓閣大衆
渴仰重說偈言象駕崢嶸但進途誰信螳螂能拒轍

請然老住東林疏

三世諸佛夢中說佛人鮮知音六代祖師頭上安頭誰

能領話家家顯露箇箇圓明須煩本分衲僧直指現前
佛性然公長老慈覺印之嫡子雪竇雅之親孫十住大
叢林硬著脊梁擔荷徧驗老尊宿怕他鼻孔喝斜一領
布衫重七斤何人定價踏著稱鉚硬似鐵唯已自知春
此東林夙稱名刹久矣鐘魚不響幾乎泉石無光龐居
士夙契丹霞裴相國能招黃蘗蓮社從今熱鬧廬山喜
有歸投願憑寶爐一瓣之香上祝聖君萬年之壽既解
乘杯渡水展赴精神通何妨滿座雨花教大家讚嘆

請悟老住徑山疏

三獸渡河誰是上根之佛種一牛吼地親逢具眼之宗
師適當叢林禁足之辰請聞竹乾出世之法恭惟某人
迅雷轉於舌本生鐵豎作脊梁挈雲門墜地之網為月
印得髓之子垢衣盡脫疑網頓除綜貫三乘縱橫五位
曇花初開於汝水衲子雲璈毒龍再擊於徑山天魔腦
裂偶憶武夷之烟月暫聽妙濟之松風不忘疇昔半面
之知是為方便不請之友如來心印故非一已可私力

士額珠要為衆人點出香花鬘書幡蓋開春願揚無上
之深嚴廣作有情之饒益祝南山萬歲之壽後天永御
于龍圖續西土四七之燈大事增光于鷲嶺毋勞固讓
便請惠然

請文老住支提疏

高山流水慕劄相逢便是知音啼鳥野花取次拈來著
箇轉語不使熱瞞伎倆直饒勘破話頭允屬當人獨判
公案恭惟某人禪機電擊道眼鏡懸隨處圓光恰是一

佛出世自然流露不與萬物為鄰無惜老漢眉毛
發明祖佛心髓打透關棧把定鉗鎚言下薦來自是本
色衲僧事棒頭悟去辦得徹底老婆心無門無善才有
地有彌勒願登獅子座便駕象王車不妨直下承當要
証向上巴鼻

請永長老住西禪疏

曾子文

見聞覺知中踏翻世界尤是滯郊進封文字語言中打
破虛空未為孤吟絕唱若也撥轉祖師上頭關棧須是

烹煉佛祖本分鈴鋌一劍當頭大地結舌某人大根大
器徹骨徹心世尊良久處別開眼睛彌勒未生時摸着
鼻孔妙喜有分贊嘆懶菴不敢盡藏為山大闡於父風
洋嶼高提於祖令王常侍擲下筆子幾蹉過於米胡裴
相公問及高僧獨惟出于黃孽城中百萬戶歸依未飽
海上十二峯時節到來俱胝一指頭道場重興此一臨
濟三頓棒家法大聲羣瞻願垂慈悲曲徇祈請

請正長老疏

不識李翱不是樂山和尚不遇韓愈不為大顛禪師姓
名已播公卿號令豈惟衲子禪師堯率的嗣林際正宗
奉頭與棒孰識其機脊梁與口都硬似鐵近放一隻聖
箭直指三山道場既是披襟便宜薦取莫教過眼却欠
承當看半句之斬新使衆耳之聾聵

請戒長老疏

蘇子瞻

大士未嘗說法誰作金毛之聲衆生各自開當何闕石
塔之事去無作相住亦隨緣長老戒公開不二門施無

盡藏念西湖之久別本是偶然為東坡而少留無不可者一時作禮重聽白椎渡口船回依舊雲山之色秋來雨過一新鐘鼓之音

請通長老疏

指衣冠以命儒蓋儒之衰認禪律以為佛皆佛之粗本來清淨何教為律一切解脫寧復有禪而世之惑者禪律相殊儒佛相笑不有正覺誰開衆迷成都通法師族本搢紳寶西州之望業通詩禮為上國之光爰自幼齡

綽有遠韻辭君親於方壯棄軒冕於垂成自儒為佛而
未始業儒由律入禪而居常持律報恩寺水陸禪院四
衆之淵數三吳之會通願振法音以助道化所為者大
無事于謙

請化長老疏

張正己

自無始來本無一物從有為後豈有二門世尊與螻蟻
共胎兜率與泥犁共境大處不容芥子小時也納須彌
足踏手拈人人皆會天覆地載處處有餘求直自失眼

晴言覺已非吾髓諸佛何曾出世六祖未曾說禪橋流水
流空付作者幡動風動本試小兒藥王但莫行醫維
摩自然無病何者今日偶然道場惟我化公漚發海南
雲飄劍外既悟樵中之塵迴收衣上之珠棄寶沈江微
咲推車居士聚沙為塔已付轉輪聖王投筌縱魚奏刀
袖手南禪燈謝諸老眼開未免赤脚入泥莫辭和衣
涉入水若逢木人問話聊與點頭或遇獅子頻呻直須
下杖時不可失師無後來

請昕律師疏

陳了翁

竊以教示別圓隨機各異乘分大小攝心豈殊慶喜遠
游捨軌範而遭魔網波離奉律漸通達而証圓門束心
必始于束身了性常資於了相請遵羯磨而講毗尼昕
公律師信奉迦提轉持布薩說南山嚴淨之戒以靈芝
高潔為師宜因隨喜之衆情廣談放逸之多咎庶起木
又之利用生那埵之緣

請天游禪師疏

孫仲益

大道直空不分禪律衆生妄見交構是非直須最上乘
人與說第一義諦豈必長連床上拊枕高眠何妨枯木
巖前拈槌一出游公長老名宣左蜀價重南州心鑑湛
然機鋒剝直舊時寵蘊愛話無生今日卧輪不妨對鏡
惟茲小刹創立叢林雖把茅蓋頭未稱作家之用而寸
鐵入手要看軍令之行諒宜隨緣寧煩固避

住菴

請僧住坟菴霜露臺疏

汪彥章

風樹纏悲既抱終天之戚泉臺卜吉適逢遠日之期念
攀緣皆自於愛生欲解脫當求於佛力佳城增廣瑞像
來臨若非除僅之男誰作住山之計某人奮身名族投
迹勝藍久從善知識游常有因緣志輒迂杖履來賁
松椒香飯化成何須摩詰淨瓶踢倒羸得為山願持不
退之心副我無窮之化

請了義住牛山菴疏

孫仲益

同產五十年為昆為弟孤墳二百里依佛依僧爰締宏

因增崇善果恭惟某人捨身得度住世隨緣拄杖經行
松楸改色結跏晏坐烏鵲來巢庶憑十力之慈大庇九
泉之壤

請僧住黃林菴疏

種蒔松楸迨今五世追營香火何止百年評公已潛九
泉之幽方老為續一燈之照凌空飛錫在處隨緣踞地
磨磚不妨穩坐

請僧住龜菴疏

一邱黃壤永依龍象之尊百寶青蓮普照松楸之上某
人安心得法隨住現身竭來給孤祇樹之園面僚達摩少
林之壁栽花種竹不妨晏坐觀空運水般柴自可優游
卒歲

請堅老住庵疏

伏以天道無方曾可決擇宗風有自所在流通惟隆報
小菴寶家山舊隱塢內桃花正發峯頭齒齒還敷不有
高人孰成勝事伏惟聖公禪老傳天風之正法住因勝

之名藍縷素舄依天人跂仰志輕榮勢心慕林泉散分
慧炬之輝光用燭冥途之昏暗三家邨裏總是道場十
字街頭未為奇特何待拈槌豎拂方名接物利生宜大
振于慈風即莊嚴于淨土存亡普利泉石增輝況以小
道必有可觀而當仁在所不讓良辰易失快便難逢鑒
茲懇誠無勞偽避

請朋老住西庵疏

一坯壘上蔽栢城拱木之陰衆香鉢中具桑門伊蒲之

供肆崇善利允屬當仁恭惟長老朋公徧住叢林久提
祖印嘗據十字路把斷要津今蓋一把茅結跏趺坐雖
云無住相寧戀三宿之桑直成不動尊當面九年之壁

請僧住牛山菴疏

百年休歇四大本空一念皈依三生不昧某人追營香
火并濟幽明宏開十力之慈光賁九泉之室即以緣而
應佇看隻履之飛隨所寓而安豈厭挹把茅之陋

請妙老住墳菴疏

蓋茆一蓆容膝有餘良藥萬金安心是法妙公長老夙
心不昧真契自投於當來世有大緣故所遇作文大佛
事望松楸而拱矣方懷風樹之悲聽瓦礫以熾然行見
雨花之墮

開堂

請法王航公開堂疏

黃魯直

本邑住山人皆授如來記居則枯木止水晏坐十方出
則疾風震雷驚動萬物不擇喧寂作大因緣中夏所瞻

崧高維嶽心不可得少林開第一之花聖從西來破竈見
本有之性從上諸祖莊嚴此山彼大法王實掘都會河
潤千里惠林來福京師鶴鳴九臯天鉢號稱真子恭惟
天鉢長老航公悟有生鴆毒乘出世舟航吹布衲之毛
傍家行脚剡法堂之草選佛登科而久閉尺壁之陰退
養衆生之病寶花玉座共知不可覆藏糞埽堆頭重為
斬新拈出

請郭山霖老開堂疏

去聖攸遠邪法崢嶸當人伏藏正宗淡薄鉢囊掛壁衲
帔蒙頭可為癡種子歸依必遭明眼人識破郭山應霖
禪師蘊天臺之雲月飽南嶽之林泉得翠巖悅一味之禪
分大愚芝千燈之燄而枯木晏坐草深法堂被悅上人
者把牛鼻繩能獅子吼唯升堂入室未見其人今日請
為大衆發蒙亦與先師雪恥要當腳踏實地舌覆大千
末山園中不負臨濟蓮花峯頂親見龍牙入泥入水為
人捍聚放開由已狸奴白牯盡教孔遼天水鳥樹林須

腦門著地

請平老開堂疏

蘇叔黨

白雲在天舒卷自我明鏡無垢妍醜現前所以去來千
變卒之無心酬酢萬狀本來無物今天寧長老平公嗣
真如法傳達摩衣學道為衆宗師出衆隨緣利益聲名
藉甚未許逃于空虛悲智無脩正可行之願力重提祖
令大振宗風作江海之慈航施山川之法雨妙高峯上
本為一大因緣昆耶城中蓋自兩無言默鼓鐘一時改

觀瓦礫莫為非人

請明教長老開堂疏

汪彥章

不離世諦諸佛刹刹現前直指心源衆生人人說法然
言下有可傳之派而古來無不續之燈不假當人孰提
正令堂頭入毘盧境界真臨濟兒孫土木形骸冰霜志
操一言半偈久為衲子傳來萬水千山行到江南靜處
潮音一振海衆遄歸正當象一千年餘大家說臘月三
十日話信手拈來皆是臨機踢倒便行要使吳頭楚尾

之區坐增齋鼓粥魚之氣遇緣斯感無事于謙

請寶林長老開堂疏

秦少游

彌勒開門唯善財而能入毘盧文室非摩詰以難居寶
林禪院南宋名區東吳勝槩本惠休繡經之地實澄觀
肄業之坊法水灣環妙峯孤秀下奩玉鑑涵日月於昏
明傍穴金蚪化風雷於呼吸既川原之秀錯仍丹雘之
鼎新飛閣浮堦就山為勢方疏圓井因本成姿即之而
智慧生望之而塵勞破九重雁塔現多寶之莊嚴萬石

鯨鐘示觀音之方便允非開士難稱覺場大師雅稱聖
箭素號禪闢投虎峯而出家遇龍浮而得法祖師衣鉢
昔時書壁而傳首座山林今以躍瓶而獲了無異議實
有聖緣往開大總持門以繼鑠迦羅眼

請乾明長老開堂疏

竊以離塵求覺已乖調御之心即幻見真方契定光之
望聖因時遠人與法差執空而取者依一精明任相而
求者認四顛倒守癡禪而定力運乾惠為悲光習以自

欺久則難變既安邪解沈迷有漏之因宜得正宗開示
無方之力昭慶上人洞該真際圓證法空於旋流轉從
之途得妙湛總持之力反聞性性體已徧於塵沙自覺
覺他功未周于毫剎輒勤三請願繼一音說見在心作
將來眼

請醴泉長老開堂疏

毛端寶剎曾何新故之常天下大禪安有去來之累惟
古佛廟實今醴泉自百年香火之餘殆一國風煙之際

塔閣連環之玉骨殿藏及錦之貝文然而飛鳥銜花空
存勝景真珠撒帳未遇明師逮軍旅之荐興獲法筵之
初啟芳公長老少通教相晚悟宗乘密行則鄉黨之所
依歸妙法則天龍之所回向游方既久於海茲深願辭臃
腫之居亟返歸來之駕為談不二以度無邊

請高郵長老開堂疏

捧頭取証尤為瓦解冰消喝下承當未免龍頭蛇尾况
乃不快漆桶無化鐵鎚徒認影以迷頭但深藏而叫屈

豈知填溝塞壑無非碧眼胡僧積嶽堆山盡是黃面老子伏惟和尚脚根點地鼻孔撩天真匠子之鈴鎚實作家之鑪鑪諸方舉唱要須十字縱橫大衆證明共看一場游戲

請高飛新老開堂疏

藕絲孔內既可追軍牛蹄泓中何妨說法况此三家村裡亦是百丈竿頭倘若當人自堪選佛今起南宗之規矩政資本色之鈴鎚新公禪師出自梵巖之叢林來佐

天王之法席但知跛跛挈挈何曾曖曖昧昧忽有悟于
吹毛遂難藏于磴米今茲拈出分明對箭當胸但看行
來不是呼雞作鳳喚回癡種子接取明眼人坐令蟻穴
蜂房俱為佛地何用龍宮玉食徒美人觀好振雷聲仰
祝堯算

請天王真老開堂疏

鄧志宏

當年主席曾煩獨脚之夔今日傳衣可無三角之虎政
賴作家之手段大繼本色之鉗鎚再起祥光喚回勝景

稱公禪老夙親文墨每觀鼻孔之捺天壯了宗乘已覺
脚根之點地掛眼金屑業已埽之帖肉汗衫于今剥矣
用勒三條之蔑來復一把之茆法窟嚙呻萬籟俱息禪
林蹴踏六合皆驚妙傳六祖之心永祝一人之算請陞
猊座便振雷音

請長老開堂疏

孫仲益

得佛心印般若流餘大千在我門中辨才今為第一而
況發地藏之衆寶鼓天雷之大聲果有當人先傳師法

恭惟禮清溪之坐授建隆之衣聚萬種之雲光烈一時
之風雨釋梵衆聖扶成智惠之言王公大人驚動聰明
之聽北方龍象未有前聞我等一衆稽首皈依

請彭老開堂疏

陳了翁

竊以獨一無似者古佛之心真俗不二者禪宗之旨唯
信能入非情可傳悟當擊竹之時誰能贊助笑在拈花
以后自合流通必先游寂默之場乃可任住持之事彭
公長老法承浮渡派出澄靈多年蘆阜之游一滴曹源

之味逢茲勝刹宜順衆緣所開苟可以利它後學亦資
于善道雲門一曲妙音不屬於宮商臨濟三關平地豈
分于彼此宜演融通之句用調垂淨之風庶令佛日之
光輝永同睿算之長久

請太平興國長老開堂疏

天台選佛之境太平祝聖之場石鼓出萬歲之聲妙音
猶在金地映千山之色寶燄常新用古人晏坐之談說
今日忘言之事疑情剥落正念流通若非密契於能仁

何以顯揚於大法言不可默今正是時璵公長老為達
摩孫具圓照眼世緣苦樂融於熙笑之中情境是非了
彼往來之相不離蘂華之坐大振海潮之音趙栢常青
普作禪庭之蔭曹源不斷永同天算之延茲事甚明勿
宜休問

請權老開堂疏

碧眼胡僧親留骨髓肉身菩薩密契風幡皆正法藏中
機寶廣長舌下語伊欲再揚宗旨何期撞著作家莫惜

當場與他勘破今權師和尚夙探虎穴獨駕牛車可謂
鎮海明珠堪任大乘法器自從吸盡西江水只恐踏殺
天下人譬一夫當衝能八面受敵好看抖擻真獅子大
吼一聲從他驅逐野狐精疾走千里

請天寧深老開堂疏

陳了翁

竊以不說而說未為究竟之談無門之門尤在離微之
境若非真寔一句何以開示羣迷宜得當仁善揚茲土
深公長老燭傳少室派出靈巖嗣本覺之前音住天寧

之勝利以一大事酬含生莫報之恩於萬斯年祝聖主
無疆之壽堯天廣大佛日光明合內外之勝緣讚延長
之亨運四衆之所咸賴一音可以普宣今正是時宜陞
此座

請應老開堂疏

天竺五葉花遍開中上曹溪一滴水普濟十方只從彈
指之間自可點頭而會今某人和尚六根已靜一念不
生身似白雲無山不到心如皎月有水相容矧彼靈峯

實唯古刹不假災新手段詎能施展家風好開不二門
示西來之祖意當以無量壽祝南面之至尊

請堂老開堂疏

此一大事切忌商量縱是作家如何持唱假使終身杜
口漏泄已多直饒半夜傳衣遮藏不得九年端坐剜肉
作瘡一擊萬知迷聲認影未離音響終涉離微雖云寂
寂醒醒未辨灑灑落落迨于季末轉見淆訛於寔際中橫分
禪律於一音內互說高低致令驕慢之流以禪為戲而

俾放逸之士謂律可除或言本自融通也自強生節目
不無方便可使流傳惟此法雲巖素號淨刹地隨人廢
宗風常墜于當年道與時興祖令忽新於今日縣宰有
更張之所使君懷外護之心呼吸之間天人改觀堂師
長老衆推高行師於安心派出韶陽香生雲岫初如闍
闍得寶便擬韜藏終為緇素奔趨不容於辭避來登法
座願振雷音的的因心誰悟少林消息冥冥垂首請參
莫照兒孫別有一言異時分付

請鑑老開堂疏

曹溪一滴本自何來少室九年但求斯事直得拈花分
付不如面壁商量至於舉錯相呈皆是事不獲已聲前
得指萬里鄉關句後明宗兩重公案無物可說一言靠
倒維摩據實而言三頓賺殺林濟放開一線作麼承當
去此二途如何會語必有人中獅子來登此處道場自
朝明變律為禪得榮公為衆演法法無異法人用當人
古鏡重磨一任猊來猊見高明有繼且見鳳生鳳兒鑑

公長老早入空門夙奉慈戒忽厭千字頓悟員宗誓學
最上乘得見如是事蓋什方勝教盡出雲巖舉一瓣香
皆生雲岫副信士精懃之請紹古人持唱之風更無可
言請陞一座

請文老開堂疏

以言演法法不在於筌蹄即物明真真豈留於影跡直
指本家面目除非本分鈴鎚更古不遷清風常在文公
長老待寶印正眼為靈巖嫡孫處雪峰之道場衆推領

袖還丹丘之舊剎不露鋒鋌今逢出世因緣即合隨時
演唱山如鷲嶺地有涌泉古師之舊迹猶存上士之孤
風可繼不離當處發千聖未傳之機永為聖君祝萬壽
無疆之慶請昇猊座一振雷音

請彥老開堂疏

邵公濟

士比退之許大顛之出世僧如惠遠招靈運以論交惟
儒釋之既同亦道德之相契顧茲妙理宜有宿因惟有
先公為時前輩爰有方外之士早從人間之游冠珮永

秘于名山松檟近依于寶地念師表常求于先友須名
德不愧于古人彥老禪師學本無心遠傳孔氏之道才
真可用近聞登觀之風寺屬老僧當悉占于規戒占辭
有感雪涕無從果哀懇之獲伸庶冥福之可薦

請祥雲院長老開堂疏

竊以大事因緣舉世沒奈何時特出作家手段是人動
不得處方施惟茲覺場幾成魔宅若無伎倆安可承當
恭惟堂頭長老禪師龜峯天馬駒靈若金獅子輝騰今

古把定乾坤本是北斗藏身暫問乾西出世放行嚴令
振取頽綱三世聖人計較未成時頗能擔負六代開士
扶持不起處徧以交加纔下水方見長人既入林須防
猛虎不啣溜漢乃帶水拖泥若伶利人則提危濟險泥
本來大機大用肯隨列道不會不知百尺竿頭已曾進
南泉之步十字關市何妨卓德召之牌鼓舌搖唇呵佛
罵祖若問文殊伏劍其意云何肯使釋迦低頭出氣不
得況有在頂一眼睥睨可把隨身七事施張若見希奇

便宜捲却祖席倘沒交涉定是掀倒繩床舉唱宗風洪
延睿算一句作麼生道

請妙行禪師開堂疏

妙行精藍真湘江之要會慶公長老真曹洞之嫡孫入
境相多因緣有在不辭鬧處方見作家象骨峯前已是
親曾受記虎頭城裏何妨舉以向人幸吐潮音用扶灌
祚

請中禪師開堂疏

眷茲中塔實乃上遊謂何鐘鼓之坊化作兵戈之地不
有廢也何以興焉琅公禪師臨濟宗派能紹隆於佛種
才不墜於家風灰燼之餘允屬開荒手段龍天之會諦
觀祝壽道場

請栖隱長老開堂疏

栖隱道場南華祖意有善知識為大宗師拈起三瓣香
不是等閒佛事放開一線路且看本分作家欲聽潮音
願留金諾

重請慈雲長老開堂疏

兵戈林裏脫身乃饑鷹爪下得兔灰燼堆頭作屋斯烈
火焰中生蓮須經魔難一場方見神通三昧智公長老
臨濟嫡孫得密傳骨髓於泐潭移正令鈴權於贛渚老
僧與鉢盂俱在依舊家風鬧市將骨薰自隨重開鋪席
好將妙語永贊丕圖

請普明長老開堂疏

苾芻林裏亘無凡根楊梅渡頭已登彼岸智公長老贛

郡名流參罷而接物應人禪餘而嘲風詠月點金于九
轉火內革律為禪進步於百尺竿頭逢場作戲好將佛
語上贊帝齡

請大觀長老開堂疏

種玉黃堂布金紺宇實古辟支佛之舊第也機鋒活落
骨象稜層真妙喜禪師之嫡孫也人景相高自是法緣
際會基圖不拔更須道力維持當以妙揚副茲公選

請空老開堂疏

水月萬象居中是名覺海風幡一句在后誰見道心某
公禪師庭栢傳家座貌增價莫問呵祖罵佛且觀舉拂
拈鎚應而不藏喜靈山之有託言而當法祝睿算以無
疆

請太平長老開堂疏

桃源勝地祭苑名藍叢席久虛輿情共俟詮公長老婺
女高人提正令之鈴鎚作諸方之領袖若許龍安山前
偕重便令獅子席上生光不動干戈已自太平之氣象

庶憑香火用扶有永之基圖

請崇寧長老開堂疏

五百歲而出君臣歌天保之詩千萬人之心香火作華
封之祝恭惟皇帝宇宙在其手日月合其明一日二日
萬機遠追神考三千大千世界已在華胥已喧輿議之
太平當習羣臣之嘉頌謂上帝降年有永既百斯男顧
吾君無得而稱惟一日壽廟堂歸美天地歡聲眷東武
之輿區有西方之故刹昔為光聖蓋揚周武之大明今

結崇寧請誦名公之江漢去彼取此因時制宜閭浮提
國中悉皆歡喜堯率陀天工如是莊嚴出猊座之大音
聲讚天恩之不思議無煩磬鼓便有道場伏願皇帝陛下
惟懷永圖自貽哲命循天寰海四維無盡而無邊如
須彌山萬劫不騫而不壞凡下潮音之下皆歸壽域之
中率時耆龐多所饒益

請圓老開堂疏

拄杖頭三千世界誰敢擔當經卷中百億塵沙如何駕

說只教饒舌便放出頭此地見有硃砂何處更尋赤李
恭惟某人首叢林之右選嗣佛日之正宗以一切為禪
悅之門將三昧為游戲之地飽嚼葛藤滋味慣使狗子
機關無談樹上之禪能說空中之相傍家行脚把牛鼻
繩象風裝帆作獅子吼念先師不可思議須尊宿明示
去來拽出漩渦須教到岸布袋放下布袋等閒到處為
家葫蘆自纏葫蘆今日逢場作戲拈出八萬四千之公
案重新三百六十之家風奉饒當面熱瞞忍得底頭冷

笑既自作家手段自當圻障補籬那堪本色鉗鎚正好
磨甄點鐵忽瞻瞻平人眼孔莫乾折自己眉毛百尺竿
頭不要忙三家市裏須還是高升猊座大震雷音

請普會長老開堂疏


舉花示道識者承當指栢明心達人究竟不離方寸即
是如來執情見者千里山河了空性者一輪水月揚眉
瞬目盡顯宗風見色求聲俱非聖解須假言詮之要方
窮真諦之歸不有導師誰知與指普會和尚密授雲門

之印親傳洪濟之衣超最上乘得不二義立諸方之標
準為末學之津梁正坐道場全提祖令一燈繼照放無
盡之寶光五葉齊開成自然之妙果幸臨法會大震潮
音願度羣迷毋辭廣說

請會長老開堂疏

種種皆真元無差別塵塵是道不假脩為由來千聖不
傳本無一法可說未超上悟須露元機指庭栢以明心
舉手花而示道欲開羣惑宜假導師勝因會長老陽岐

遠孫佛果嫡子高提祖印大闡家風開方便之多門句
中有眼指莊巖之淨土佛外無心幸振潮音來臨法席



五百家播芳大全文粹卷七十八